

四庫全書

史部

欽定四庫全書

宋史卷一百三十四

元中書右丞相總裁托克托等修

樂志第八十七

樂九 樂章二

太朝常享

禘祫

加上徽號

郊前廟享

皇后別廟

建隆以來祀享太廟一十六首

迎神禮安 肅肅清廟奉祠來詣格思之靈如在之祭

克謹威儀載嚴容衛降福孔皆以克永世

皇帝行隆安 工祝升階賓尸在位祇達孝思允修
祀顯相有儀克恭乃事儼恪其容通此精意

奠瓚用瑞木 木符啓瑞著象成文於昭大號協應明
君靈命有屬鴻禧洞分歌以升薦休嘉洽聞

又馴象 嘉彼馴象來歸帝鄉南州毓質中區效祥仁
格巨獸德柔遐荒有感斯應神化無方

又玉烏 素烏爰止淳精允臧名符瑞牒色應金方潔

白容與翹英奮揚孝思攸感皇德逾張

奉俎豐安

維犧維牲以魚以烹植其鞞鼓潔彼鉶羹

孔碩茲俎於穆厥聲肅雍顯相福祿來成

酌獻僖祖室大善

湯湯洪河經啓長源鬱鬱嘉木挺

生本根大哉宗基出乎慶門發祥垂裕永世貽孫

順祖室大寧

元鍾九千生於仲呂宗臺九層起於累

土赫日之升明夷為主孝孫作帝式由祖武

翼祖室大順

明明我祖積德攸宜肇繼瓜瓞將隆本

支爰資慶緒式昭帝基於穆清廟永洽重熙

宣祖室大慶 艱難積行繇長鍾慶同人之時得主乃

定既叙宗祧乃修舞詠經武開先永昭丕命

太祖室大定 猗歟太祖受命于天化行區宇功溢簡

編武威震耀文德昭宣開基垂統億萬斯年

太宗室大盛 赫赫皇運明明太宗四隩咸暨一變時

雍睿文炳煥聖德溫恭千齡萬祀永播笙鏞

飲福禧安 嘉粟旨酒博膺牲牲神鑒孔昭享茲吉蠲

夙夜絜祀孝以奉先永錫純嘏功格于天

亞獻正安 已象文治乃觀武成進退可度威儀克明
終獻正安 常武徂征詩人所稱總干山立厥象伊凝
徹豆豐安 肥腍之牲既析既薦鬱鬯之酒已酌已獻
祝辭亦陳和奏斯徧享禮具舉徹具有踐

攝事十三首

降神理安 肅肅清廟昭事祖禰粢盛苾芬四海來祭
皇靈格思令容有睟降福孔皆以克永世

太尉行正安

裸鬯溥將賓尸在位帝德升聞孝思光

被公卿庶正傳御師氏至誠感神福祿來暨

奠瓚瑞安

淳清育物瑞木成文元氣陶冶非煙郁氛

玄貺昭格至和所熏登歌裸獻彤饗如聞

奉俎豐安

麗碑割牲以魚以烹博碩肥腍薦羞神明

祖考來格享于克誠如聞馨歆式燕以寧

酌獻僖祖室大善

肅肅藝祖肇基鴻源權輿光大燕

翼貽孫載祀惟永慶流後昆威靈在天顧我思存

順祖室大寧 思文聖祖長發其祥錫羨蕃衍德厚流

光眷命自天卜世聿昌祇肅孝享降福無疆

翼祖室大順 明明我祖積德累仁居晦匿曜邁種惟

勤帝圖天錫輝光日新寢廟繹繹昭事同寅

宣祖室大慶 泱泱我祖時惟鷹揚潛德弗耀發源靈

長肆類配天永思不忘來顧來享百福是將

太祖室大定 赫赫太祖受命于天赤符啓運威加八

埏神武戡難功無間然翼翼丕承億萬斯年

太宗室大盛 穆穆太宗與天合德昧且不顯乾乾翼
翼敷佑下民時帝之力永懷聖神孝思罔極

真宗室大明 煌煌真宗善繼善承經武耀德臻于治
平封祀禮樂丕昭鴻名陟配文廟皇圖永寧

徹豆豐安 鼎俎既陳豆籩既設金石在庭工師就列
備物有嚴著誠至潔孝惟時思禮以雍徹

送神理安 神之來兮風肅然神之去兮升九天排凌
兢兮還恍惚羽旄紛兮蕭燔煙

真宗御製二首

奠瓚用萬國朝天 鴻源濬發睿圖誕彰高明錫羨累
洽延祥巍巍藝祖溥率賓王煌煌文考區宇大康珍
符昭顯寶歷綿長物性茂遂民俗阜昌甫田多稼禾
黍穰穰含生嘉育鳥獸蹒蹒八紘統域九服要荒沐
浴惠澤祇畏典常隔谷分壤望斗辨方並襲冠帶來
奉圭璋莪莪雙闕濟濟明堂諸侯執帛天后當陽何
以辨等袞衣繡裳何以褒德輅車乘黃聲明煥赫雅

頌汪洋啓茲丕緒佑我無疆大統斯集大樂斯揚俯
隆宗祐仰繼穹蒼

亞獻終獻用平晉樂 五代衰替六合攜離封疆竊據
兵甲競馳天顧黎獻塗炭可悲帝啓靈命濬哲應期
皇祖丕變金鉞俄麾率土執贄擴俗來儀瞻彼大鹵
竊此餘基獨迷文告莫畏天威神宗繼統璿圖有輝
尚安蠢爾罔懷格思六飛夙駕萬旅奉辭徯來發詠
不陣行師雲旗先路壺漿塞岐天臨日照宸慮通微

前歌後舞人心悅隨要領自得智力何施風移僭冒
政治淳熙書文混一盛德咸宜干戈倒載振旅言歸
誕昭七德永定九圍

真宗告饗六首

告受天書瑞安 寶命自天鴻禧錫祚昭晰綠文氤氲
黃素玄感薦彰靈休誕布寅奉珍符聿懷永慕

太祖太宗加上尊謚顯安 報貺陟封聿昭典禮讓德
穹厚歸功祖禰丕顯尊稱盡善盡美寅威孝思以介

蕃社

東封畢躬謝酌獻封安 奕奕清廟錫美詒謀升中神
嶽顯允皇猷歸格藝祖昭報靈休奉先追遠盛德益
修

祀汾陰畢躬謝酌獻顯安 於昭列聖休德清明威靈
如在享于克誠報功厚載馨薦惟精歸格飲至禮備
樂成

聖祖降親告瑞安 於赫聖祖景靈在天神遊來暨睟

容穆然誨言昭示帝胄開先齊明欽若延鴻億年
六室加謚顯安 欽宗太霄肅奉徽冊大禮克誠鴻猷
有赫令芳爰薦明靈斯格昭謝垂祥永懷何極

景祐親享太廟二首

迎神興安 追養奉先納孝練主金奏鳳鳴闕雝樂舞
奠鬯恭神肥腴展俎積慶聰明降景寰宇

酌獻真宗室大明 於穆真皇宅心道粹和戎燕革煥
乎文治操瑞拜圖封天祀地盛德為宗烝嘗萬世

至和祫享三首

迎神興安 濡露降霜永懷孝思祫食諦叙再閏之期
歌德詠功八音播之歆神惟始靈其格茲

奠瓚嘉安 昭穆親祖自室祖堂禮備樂成肅然裸將
瑟瓚黃流條鬯芬芳氣達淵泉神孚來享

送神興安 四祖基慶三后在天薦侑備成靈娛其旋
孝孫應嘏受福永年送之懷之明發惻然

嘉祐祫享二首

迎神懷安 躬茲孝享禮備樂成神登于俎祝導于祊
展牲肥腍奏格和平靈其昭格肅儉凝情

送神懷安 靈神歸止光景肅然福祥裕世明威在天
孝孫有慶駿烈推先佑茲基緒彌萬斯年

熙寧以後享廟五首

酌獻英宗室大英 在宋五世天子嗣昌躬發英斷若
乾之剛聲容沄沄被于八荒垂千萬年永烈有光

送神興安 鐘鼓惟旅籩豆孔時衍我祖宗既右享之

神亟來止孝孫之喜神保聿歸孝孫之思

禘祫孟享臘享宗正卿升殿正安 進退有容服章有

儀匪亟匪遲降登孔時

祫享仁宗大和 於穆仁廟聖澤滂流華夷用乂動植

蒙休徽名冠古奕世垂謀帝躬裸獻盛典昭修

英宗大康 赫赫英皇總提邦紀濬發神功恢張聖理

仙馭雖遙鴻徽不弭永言孝思竭誠躬祀

常祀五享三首

迎神興安

九變

奕奕清廟昭穆定位霜露增感黍盛潔

祭神靈來格福祉攸暨追孝奉先本支百世

太尉奠瓚嘉安

有秩時祀匪怠匪瀆有來宗主載祇

載肅厥作裸將流黃瓚玉是享是宜永綏多福

送神興安

皇祖皇考配帝配天駿奔顯相神保言旋

祝以孝告嘏以慈宣去來永慕宗事惟虔

紹興以後時享二十五首

迎神興安黃鐘為宮

奉先嚴祀率禮大經時思致享

肅薦芳馨竭誠備物樂奏和聲真馭來止熙事克成
大呂為角 聖靈在天九闕崇深風馬雲車紛其顧臨
擁祥儲休昭答孝心孝孫受祉萬福是膺

太簇為徵 嘉承和平秩祀為先乃練休辰祝史告虔
內心齊明祀具吉蠲交際恍惚如在後前

應鍾為羽 道信於神神靈燕娛酒有嘉德物惟其時
緩節安歌樂奏具宜欣欣樂康福祿綏之

奉俎豐安 王假有廟子孫保光奉牲以告玉俎膏香

專精厲意神其廸嘗休承靈意申錫無疆

初獻盥洗正安 恪恭祀典涓選休成設洗致潔直于
東榮嘉觴祇薦明德惟馨祖考來格享茲孝誠

升殿正安 冠佩雍容時惟上公享于清廟陟降彌恭
籩豆靜嘉粢盛潔豐孝孫有慶萬福來同

禧祖室酌獻基命 於穆文獻自天發祥肇基明命錫
羨無疆子孫千億宗社靈長神之格思如在洋洋

宣祖室酌獻天元 天啓炎厯集我大命長發其祥篤

生上聖夷亂芟荒乾坤以定時祀聿修孝孫有慶

太祖室酌獻皇武赫赫藝祖受天明命威加八紘德

垂累聖祀事孔明有嚴笙磬對越在天延休錫慶

太宗室酌獻大定明明在上時維太宗允武允文丕

基紹隆於肅清廟昭報是豐皇靈格思福祿來同

真宗室酌獻熙文於穆真皇維烈有光丕承二后奄

奠萬方威加戎狄道格穹蒼歆時禋祀降福無疆

仁宗室酌獻美成至哉帝德乃聖乃神恭已南面天

下歸仁歷年長久垂裕後人祀修舊典寶命維新

英宗室酌獻治隆 炎基克鞏赫赫英宗紹休前烈仁

化彌隆篤生聖子堯湯比蹤烝嘗萬世福祿來崇

神宗室酌獻大明 於昭神祖運撫明昌肇新百度克

配三王遐荒底績聖武維揚永言執競上帝是皇

哲宗室酌獻重光 於皇濬哲適駿有聲率時昭考丕

顯儀刑功光大業道協三靈永綏厥後來燕來寧

徽宗室酌獻承元 天錫神聖徽柔懿恭垂衣拱手遵

制揚功配天立極體道居中佑我烈考萬福攸同

欽宗室端慶 於皇欽宗道備德宏允恭允儉克類克
明孝遵前烈仁翊函生歆茲肆祀永燕宗祊

高宗室大德 於皇時宋自天保定高宗受之再僕景
命紹開中興翼善傳聖何千萬年永綏厥慶

孝宗室大倫 聖人之德無加於孝思皇孝宗履行立
教始終純誠非曰笑貌於萬斯年是則是倣

光宗室大和 維宋洽熙帝繼于理萬姓厚生三辰順

軌對時天休以燕翼子肅唱和聲神其有喜

文舞退武舞進正安 肅肅清廟於顯維德我祀孔時

我奏有翼秉翟載駮有來干戚神之燕娛休祥允格

亞終獻文安 觀德宗祏奕世烈光有嚴祀典粵循舊

章樂諧九變獻舉重觴燕娛如在哉穀穰穰

徹豆恭安 禮備樂成物稱誠竭相維辟公神人以說

歌雍一章諸宰斯徹天子萬世無競維烈

送神興安 霜露既降時思展禋在天之御睠然顧歆

樂成禮備言歸靡停既安既樂福祿來成

裕享八首

迎神興安黃鍾宮 時維孟冬霜露既零合食盛禮以

時以行孝心翼翼惟神來寧肅倡斯舉神具是聽

大呂角 於穆孝思嘉薦惟時誠通茲格咸來燕娛神
之聽之申錫蕃釐於萬斯年永保丕基

太簇徵 於昭孝治通乎神明寒暑不忒熙事備成牲

牲孔碩黍稷惟馨以享以祀來燕來寧

應鍾羽 苾芬孝祀薦灌肅雍致力於神明信咸通靈
之妥留惠我龐鴻廣被萬寓福祿攸同

初獻順祖酌獻大寧 於赫皇祖濬發其祥德盛流遠
奕世彌昌孝孫有慶嘉薦令芳神保是享錫羨無疆
翼祖酌獻興安 上天眷命佑我不基翼翼皇祖不耀
其輝積厚流長福祿攸宜祀事孔時曾孫篤之

光宗室酌獻大承 於皇光宗握符御極昭哉嗣服惟
仁與德勤施於民靡有暇逸萬年之思永奠宗祏

送神興安 合祭大事因時發天翼翼孝思三獻禮虔
神兮樂康飈馭言旋永福後人於千萬年

上仁宗英宗徽號一首

入門升殿顯安 於穆仁祖寵綏萬方執競英考迄用
成康圖徽寶冊有烈其光庶幾億載與天無疆

上英宗尊號一首

入門正安 在宋五世天子神明羣公奉冊迺揚鴻名
金書煌煌迺昭厥成思皇多祐與天同聲

增上神宗徽號一首

哲宗朝製

升殿顯安 於惟禰廟乃聖乃神秉文之士作起惟新
建宮稽古一視同仁庶幾備號以享天人

紹興十四年奉上徽宗冊寶三首

冊寶入門顯安 於鑠徽考如天莫名迨茲丕揚擬純
粹精溫玉鏤文來至于祊有嚴奕奕禮備樂成

冊寶升殿顯安 金字煌煌瑤光燦燦羣工奉之登此
寶殿對越祖宗式遵成憲威靈在天來止來燕

上徽號顯安 惟精惟一乃聖乃神鴻名克揚茂實斯
賓如禹之功如堯之仁孝思永慕用詔無垠

淳熙十五年上高宗徽號三首

冊寶入門顯安 於穆高皇功德兼隆稱天以誅初謚
未崇載稽禮典揚徽垂鴻涓日之良登進廟宮

冊寶升殿顯安 有瑑斯寶有編斯冊導以麾仗奏以
金石祲威盛容煌煌赫赫臣工奉之高靈來格

上徽號顯安 中興之烈高掩商宗揖遜之美放勳比

隆字十有六擬諸形容威靈在天裕後無窮

慶元三年奉上孝宗徽號三首

冊寶入門顯安 魏巍孝廟聖德天通同符藝祖克紹

高宗有儀有冊載推載崇鏤玉繩金登奉祏宮

冊寶升殿顯安 文金晶熒冊玉輝潤統紹乎堯德全

于舜勤崇推高子孝孫順冠德百王萬年垂訓

上徽號顯安 金石充庭珩璜在列繪畫乾坤形容日

月魏巍功德顯顯謨烈垂億萬年鴻徽昭揭

高宗郊祀前朝享太廟三十首

皇帝入門乾安

後還前殿並同

於皇我后祇戒專精假於有

廟祖考是承趨進惟肅僣思惟誠神之聽之來燕來

寧

皇帝升殿乾安

詣室降殿並同

皇皇大宮丕顯於穆休德昭

清元氣回復芝葉蔓茂桂華馮翼孝孫假斯受茲介

福

盥洗乾安

惟皇齊精醴假于廟觀盥之初惟以潔告

衍承祖宗恤祀昭孝誠心有孚介福斯報

迎神興安 秬鬯既將黃鍾具奏肅我祖考祇栗以俟

監觀于茲雲車來下

尚書奉俎豐安 有碩其牲登于大房肅展以享庶幾
迪嘗匪膺是告我民其康保艾爾後垂休無疆

皇帝再盥洗乾安 盥至于再潔誠愈孚帝用祇薦靈
咸嘉虞騰歌臚歡會于軒朱觀厥顯若受福之符

僖宗室酌獻基命 思文禧祖基德之元皇武大之受

命于天積厚流光不已其傳曾孫篤之於萬斯年

翼祖室酌獻大順 天命有開維仁是依迺瞻冀邦于

以顧之其顧伊何發祥肇基施于孫子虔奉孝思

宣祖室天元 昭哉皇祖源深流長雕戈圭瓚休有烈

先天祐潛德繼世其昌永懷積累嘉薦令芳

太祖室皇武 為民請命皇祖赫臨天地並眎億萬同

心造邦以德介福宜深挹彼惟旨真游居歆

太宗室大定 皇矣太宗嗣服平成益奮神旅再征不

庭文武秉德仁孝克明以聖傳聖對越紫清

真宗室熙文 思文真宗體道之宗愴威赫靈遵制揚

功真符鼎來告成登封盛德百世於昭無窮

仁宗室美成

徽宗御製

仁德如天徧覆無偏功濟九有恩

涵八埏齊民受康朝野晏然擊壤歌謠四十二年

英宗室治隆 穆穆英宗持盈守成世德作求是纘是

承齊家睦族偃武恢文於薦清酌酌之欣欣

神宗室大明 烝哉維后繼明體神稽古行道文物一

新潤色鴻業垂裕後人靈旂沛然來燕來寧

哲宗室重光 明哲煌煌照臨無疆紹述先志寔宣重

光詒謀燕翼率由舊章苾芬孝祀降福穰穰

徽宗室承光

御製

於皇烈考道化聖神堯聰舜孝文恬

武忻命于出震遺駿上賓罔極之哀有古莫倫

降殿乾安 明德惟馨進止回復裼襲安恭嚴若惟谷

誠意昭融羣工袂屬成此禋容生乎齊肅

八小次乾安 於皇我后祗戒專躬製聲詩文思聰

明雍容戾止玉立端誠神聽如在福祿來寧

文舞退武舞進正安 八音諧律綴兆充庭進旅退旅

肅恭和平盛薦祖宗靈監昭升象功崇德適觀厥成

亞獻正安 威神在天享于克誠申以貳觴式昭德馨

邊豆孔嘉樂舞具陳庶幾是聽福祿來成

終獻正安 疏羃三舉誠意一純孰陪予祀公族振振

神具醉止燕娛窈冥於萬斯年綏我思成

皇帝出小次乾安 夙戒告備禮節俯成妥侑惟乾氛

氲夜澄有嚴有翼列聖靈承於穆清闕肅肅無聲

皇帝再升殿詣飲福位乾安 維皇親享至再至三禮

備樂奏層陛森嚴粲盛芳潔酒醴旨甘雲車風馬從

衛觀瞻

飲福禧安 赫赫明明維祖維宗鑒于文孫維德之同

日靖四方亦同其功億萬斯年以承家邦

還位乾安 帝既臨享步武鳴鸞陟降規矩顯昂周旋

登歌一再典禮莫愆神之聽之祉福緜緜

尚書徹豆豐安

熙事既成嘉籙告徹洋洋來臨藹藹

布列配帝其功在天對越允集叢釐萬邦和悅

送神興安

神之來游風馬雲車淹留彷彿顧瞻欵欵

神之還歸鈞天帝居監觀于下何福不除

降殿乾安

於皇上天欽哉成命集于冲人不承列聖

爰熙紫壇于廟告慶彤鬯潛通休祥薦應

還大次乾安

盛德豐功一祖六宗欽翼燕詒禋享是

宗厲意齊精假廟惟恭率禮周旋福祿來同

寧宗朝享三十五首

皇帝入門乾安 王假有廟四極駿奔鼎俎宵嚴虞篚
雲屯積厚流廣德隆慶蕃是則是繩保我子孫

升殿乾安 於穆清宮奕奕孔碩芝莖蔓秀桂華馮翼
八簋登列六瑚賁室皇代擁慶啟佑千億

盥洗乾安 天一以清地一以寧維皇精專承神明靈
娥御墮津瀆祗揚溟盟事允嚴先祖是聽

詣室乾安 丹楹雲深芳勺宵奠樂華淳鬯禮文炳綯

有容有儀載肅載見維時緝熙世世以燕

還位乾安 旅楹有閑人神允叶福以德昭饗以誠接

六樂宣揚百禮煒燿對越在天流祚萬葉

迎神興安

九變

黃鍾為宮

咸英備樂簋席列筮詩歌安

世聲叶皇雅翠旗羽蓋雲車風馬神其來兮以燕以

下

大呂為角 勾陳旦闕闔闔夜分軫風挾月車駟凌雲

瑞景晻靄神光耀煜神其來兮以留以忻

太簇為徵

穆穆紫幄璜璜清宮旱麓流詠鳧鷖叶工

道閎詒燕業綿垂鴻神其來兮以康以崇

應鍾為羽

文以謨顯武以烈承聖訓之保祖武之繩

有肅孝假式嚴衍烝神其來兮以宜以寧

捧俎豐安

簋豆薦牲鉶籩實饋其俎孔庶吉蠲為饗

惟德達馨以忱以貴神既佑享祉貺來暨

再詣盥洗乾安

精粹象天明清鑒月再御茲盥益致

其潔齊容顯若誠意洞徹百禮允洽率禮不越

真宗室熙文 天地熙泰躋時昇平闡符建壇聲容文
明君臣賡載夷夏肅清本支百世持盈守成

仁宗室美成 在宋四世天子聖神用賢致治約已裕
民海內富庶裔夷肅賓四十二年堯舜之仁

英宗室治隆 明明英后仁孝儉恭丕顯丕承增光祖
室繼志述事遵制揚功萬邦作孚盛德形容

神宗室大明 厲精基治大哉乾剛信賞必罰內修外
攘禮樂法理號令文章作新之功度越百王

哲宗室重光 於皇我宗世有哲明元祐用人適駿有
聲紹述先志思監于成受天之祐王配于京

徽宗室承元 帝撫熙運晏粲協期禮明樂備文恬武
嬉道光授受謀深燕詒駿命不易子孫保之

欽宗室端慶 顯顯令主輝光日新奉親以孝綏下以
仁兢兢業業誕保庶民於穆不已之德之純

高宗室大德 昊天有命中興復古治定功成修文偃
武德隆商宗業閔漢祖付託得人系堯之緒

孝宗室大倫 藝祖有孫聰睿神武紹興受禪歸尊于
父行道襲爵百度修舉聖德曰孝光于千古

光宗室大和 維宋洽熙帝繼于理萬姓厚生三辰順
軌對時天休以燕翼子肅唱和聲神其有喜

還位乾安 在周之庭設業設虞酒醴惟醺爾殺伊脯
帝觴畢勺天步旋舉丕顯丕承念茲皇祖

降殿乾安 黼幄蟬蛸颺存寧燕尊彝獻裸瑚簋陳薦
眎儀天旋淳音韶變適求厥寧福祿流羨

入小次乾安 皇容肅祗天步舒遲對越惟恭敬事不
遺陟降蒞止永言孝思上帝臨女日監于茲

文舞退武舞進正安 明庭承神鞀磬祝敵玉梢飾歌

佾綴維旅既肖厥文復象乃武祖德宗功惟帝時舉
亞獻正安 尊掌星陳壘幕雲舒來貳鸞觴玉珮瓊琚

相予嚴祀秉德有初對揚王休何福不除

終獻正安 秉德翼翼顯相肅雝疏幕三舉誠意益恭
光燭黼繡和流笙鏞子孫衆多福祿來從

出小次乾安 廟楹邃嚴夜景藻清文物炳彪禮儀熙
成帷宮載敬珮珩有聲帝復對越將受厥明

再升殿乾安 明明維后詒厥孫謀系隆我漢陳錫哉
周以孝以饗世德作求介以繁祉萬邦咸休

飲福乾安 玉瓚黃流有飮其香來假來享降福穰穰
我應受之湯孫之將有百斯男福祿無疆

還位乾安 聖圖廣大宗祊光輝假于有廟帝命不違
僂若有慕夙夜畏威嘉樂君子福祿邴邴

徹豆豐安 升饌有章 卒食攸序 庭鏘金奏 凱收銅筥
其獻惟成 其餽維旅 禮洽慶流 皇祖之祐

送神興安 珠幄煥黃 神既燕娛 監觀于下 福祿來宜
雲車風馬 神保聿歸 啟佑我後 福祿來為

降殿乾安 聖有謨訓 詒謀燕翼 奉天酌祖 萬世維則
維皇孝熙 乾乾夕惕 禮既式旋 惟福之錫

還大次乾安 王假有廟 對越在天 帷宮旋御 率禮不
愆 泰時展祠 雲陽奉瑄 齊居精明 益用告虔

理宗朝享三首

皇帝升降乾安 於皇祖宗清廟奕奕威靈在天不顯

惟德垂裕鴻延詒謀燕翼孝孫格斯受祉罔極

迎神興安九奏 秬鬯既將黃鍾具奏瞻望真游優若

有慕於皇列聖在帝左右雲車具來以妥以侑

寧宗室大安 帝德之休恭儉淵懿三十一年謹終如

始升祔在宮祖功竝美民懷有仁何千萬世

高宗祀明堂前朝享太廟二十一首

皇帝入門乾安 於皇我后祇戒專精齊肅有容祖考
是承造次匪懈孝思純誠神聽有格福祿來寧

升殿乾安 肅哉清宮煥珠照幄神之來思八音振作
赤舄龍章奉玉惟恪匪今斯今先民時若

盥洗乾安 於皇維后觀盥之初精意昭著既順既愉
圭鬯承祀卿士咸趨目視心化四方其孚

迎神興安 涓選休成祖考是享夙夜專精求諸惚恍
洋洋在上惟神之仰鬯矣清明應之如響

捧俎豐安 來相于庭鳴鏞鏘奉牲而告登彼雕房

非牲之備民庶是康神依民聽上帝斯皇

僖祖室酌獻基命 何慶之長實兆于商由商太戊子

孫其昌皇基成命宋道用光詒厥孫謀膺受四方

翼祖室大順 上帝監觀維仁是依繼世修德皇心顧

之其顧伊何在彼冀方施于子孫降福穰穰

宣祖室酌獻天元 昭哉皇祖駿發其祥雕戈圭瓚盛

烈載揚天錫寶符俾熾而昌神聖應期赫然垂光

太祖室皇武 猗歟皇祖下民攸歸膺帝之命龍翔太
微戎車雷動天地清夷峨峨奉璋萬世無違

太宗室大定 煌煌神武再御戎軒時惠南土旋定太
原車書混同聲教布宣維天佑之億萬斯年

真宗室熙文 於皇真宗體道之崇游心物外應迹寰
中四方既同化民以躬清淨無為盛德之容

仁宗室曲同郊祀

送神亦同

英宗室治隆 噫我大君嗣世修文維文維武謏繼虞

勲天錫丕祚施于後昆於薦清酌之欣欣

神宗室大明 烝哉維后繼明體神憲章文武宜民宜
人經世之道功格于天子孫嚴祀無窮之傳

哲宗室重安 明哲煌煌照臨無疆丕承先志嘉靖多
方朝廷尊榮民庶樂康珍符來應錫茲重光

徽宗室承元 聖孝巍巍光紹丕基禮隆樂備時維純
熙天仁兼覆皇化無為功成弗處心潛希夷

文舞退武舞進正安 作樂合祖奠簋在庭衆奏具舉

肅雝和鳴神靈來格庶幾是聽
皦繹以終永觀厥成
亞獻正安 威神在天來格于誠
既載清酤有聞無聲
相予熙事時賴宗英肅肅雝雝
允協思成

終獻正安 疏晷三舉誠意一純
孰陪予祀公族振振
明靈來娛樂舞具陳奉神所佑
昭孝息民

飲福禧安 赫赫明明德與天通
施于孫子福祿攸同
日靖四方民和年豐有秩斯祐
申錫無窮

徹豆豐安 歆我齊明威德如存
牲牲是享圭玉其溫

羣公執事亦既駿奔禮成告徹咸福黎元

還大次乾安 神明既交恍若有承欽翼齊莊福祿具

膺王業是興祖武是繩佑我億年以莫不增

孝宗明堂前享太廟三首

徽宗室酌獻承元 明明徽祖撫世升平制禮作樂發

政施仁聖靈在天德澤在民億萬斯年保佑後人

高宗室大德 於皇時宋自天保定高宗受之再僕景

命紹開中興翼善傳聖何千萬年永綏厥慶

還大次乾安 禮既行矣樂既成矣維祖維妣安且寧
矣皇舉玉趾佩鏘鳴矣拜貺總章于厥明矣

理宗明堂前朝享二首

寧宗室奠幣定安 皇矣昭考聖靈在天稱秩宗祀有
嚴恭先奉幣以薦見之儼然仁深澤厚厥光以延

酌獻考安 假哉皇考必世後仁嘉靖我邦與物皆春
之純之德克配穹昊餘慶淵如佑我後人

皇后廟十五首

迎神肅安 闕宮翼翼雅樂洋洋牲器肅設几筵用張
飾以明備秩其令芳神兮來格風動雲翔

太尉行舒安 服章觀象山龍是則容止蹌蹌威儀翼
翼

司徒捧俎豐安同徹 恪恭奉祀祇薦犧牲九成爰奏有

俎斯盈

酌獻孝明皇后室惠安 祀事孔明廟室惟肅銅登籩
豆金石絜竹既灌既薦允恭允穆奉神如在以介景

福

孝惠皇后室奉安 初陽作配內助惟賢柔順中積英

徽外宣神宮有佺明祀惟虔歆誠降祐於萬斯年

孝章皇后室懿安 猗那淑聖象應資生配天作合與

日齊明椒宮垂範彤史揚名聿修懿祀永奉棗盛

懿德皇后室順安 王門稟慶帝族惟賢功存內治德

協靜專流芳圖史垂範絃綖新廟有佺祀禮昭然

淑德皇后室嘉安 明明英媛德備椒庭籩豆有踐黍

稷匪馨靜嘉致薦容與昭靈精意以達顧享來寧

莊穆皇后室理安 曾孫襲慶柔祗育德正位居體其

儀不忒教被宮壺化行邦國祝史正辭垂裕無極

莊懷皇后室永安 淑德昭著至樂和平登豆在列膺

香薦誠六變合禮八音諧聲穰穰景福佑我休明

元德皇后廟興安 為太宗后為天下母誕聖繼明膺

乾作主玉振金相蘭芬桂芳於萬斯年永奉烝嘗

飲德禧安 彝尊鬯酒慶佑遂行介以純嘏允荅明誠

亞獻恭安 宗臣率禮步玉鏘鏘吉蠲斯獻百祿是將
終獻順安 薦獻有終禮容斯穆以奉嘉觴以膺多福
送神歸安 明禋告畢靈輅難留升雲杳邈整馭優游
誠深嘉栗禮罄欽修豐融垂佑以永洪休

景佑以後樂章六首

章獻明肅皇太后室奠瓚達安 肅肅闕宮順時薦事
鬱鬯馨香如見於位

酌獻厚安 祥標曾麓德合方儀萬方展養九御蒙慈

孝恭祊祐美播聲詩淑靈顧享申錫惟祺

章懿皇太后室奠瓚報安 青金玉瓚裸將于京永懷

罔極夙夜齊明

酌獻衍安 翊佑先朝章明壺教淑順謙勤徽音在劬
樹風不止劬勞匪報忝稷令芳嘏茲乃告

奉慈廟章惠皇太后室奠瓚翕安 裸圭既陳酌鬯斯

醇音容彷彿奠獻惟寅

酌獻昌安 內輔先猷夙昭壺則保祐之勞慈惠其德

榮養有終芳風無極享獻闕宮載懷悽惻

真宗汾陰禮畢親謝元德皇后室三首

迎神肅安 闕宮奕奕韶樂洋洋牲幣虔布几筵肅張

醴泉淳美嘉有潔香俟神來格降彼帝鄉

奉俎豐安 樂鏗金石俎奉犧牲九成斯奏五教爰行

送神理安 鸞駮復整鶴駕難留白雲縹緲紫府深幽

廟雖載止神無不游垂佑皇宋以永鴻休

元德皇后升祔一首

顯安之曲 顯矣皇妣德侷柔祗升祔太室協禮之宜

耀彼寶冊列之尊彝惟誠是厚永祐慶基

崇恩太后升祔十四首

入門顯安 覩天生德作配元符儀刑壺則輔佐帝圖
登宗廟祔勒號璠璣烝嘗億載皇極之扶

神主升殿顯安 曰嬪于京天作之配進賢審官克勤
其志於穆清廟本仁祖義億萬斯年神靈攸暨

迎神興安四章黃鍾宮二奏 闕宮有佺堂筵屹崇靈

徽匪遐精誠感通苾芳維時登茲明祀泠然雲車有
來其馭

大呂角二奏 羽旌風翔翠旌飄舉儼其音徽登茲位
處笙鏞始奏合止祝啟是享是宜永求伊祐

太簇徵二奏 枚枚闕宮鼎俎肆陳烝昇明靈登其嘉
新鼓鐘既戒旨酒既醇攸介攸止純禧薦臻

應鍾羽二奏 旨酒嘉肴于登于豆是享是宜樂既合
奏衍我懿德執事溫恭靈兮允格有翼其從

壘洗嘉安 列爵陳俎芬芳和羹擬金擊石洋洋和聲
禮行伊始我德惟明既盥而往於昭斯誠

升降殿熙安 笙簫紛如陟彼廟庭鏘鏘佩玉懷茲先
靈神保聿止音容杳冥繁禧是介萬年惟寧

酌獻茲安 雖雖玉佩清醑惟良粢盛具列有飴其香
懷其徽範德洽無疆於茲燕止降福穰穰

亞獻神安 嬪于潛邸爰正坤儀闕睢化被思齊名垂
柔德益茂家邦以熙皇心追崇永羞牲粢

退文舞進武舞昭安 翩然干戚揚庭陳階文以經緯

武以威懷其張其弛節與音諧迄茲獻孚妥靈綏來
終獻儀安 珩璜之貴禕褱之尊天作之合內治慈溫
元良鍾慶祉福乾坤以享以祀事亡如存

徹豆成安 鏘洋純繹於論鼓鍾周旋陟降齊莊肅容
維壘既旨維籩伊豐歌徹以雍介福來崇

送神興安 黍稷維馨虞業充庭既欽既戒靈心是承
顧予烝嘗言從之邁申錫無疆是用大介

上冊寶十三首

冊寶入門隆安 威儀皇止庶尹在庭爰舉徽章遙觀
厥成勒崇揚休寫之瓊瑛迄于萬祀發聞惟馨

冊寶升殿崇安 有猶有言順承天則聿宗號名再揚
典冊朱英寶函左右翼翼千秋萬歲保茲無極

迎神歆安黃鍾宮 籩豆大房犧尊將將馨香既登明
靈廸嘗其樂伊何吹笙鼓簧靈來燕娛降福無疆

大呂角二奏 吉蠲惟時禮儀既備奉璋峨峨羣公在

位神之格思永錫爾類展彼令德於焉來暨

太簇徵二奏 雍雍在宮翼翼在庭顯相休嘉肅雍和
鳴神嗜飲食明德惟馨綏我思成式燕以寧

應鍾羽二奏 犧牲既成籩豆有楚擬金擊石式歌且
舞追懷懿德令聞令儀靈兮來格是享是宜

巽洗嘉安 嘉肴旨酒潔粢豐盛既盥而往以我齊明
有孚顒若黍稷非馨神之格思享于克誠

升降熙安 佩玉鏘鏘其來雝雝陟降孔時步武有容

恪茲祀事神罔時恫綏我邦家福祿來崇

酌獻明安 旨酒嘉粟有飶其香衍我淑靈歆此令芳
德貽彤管號正椒房神具醉止降福穰穰

退文舞進武舞昭安 籥翟既陳干戚斯揚進旅退旅

一弛一張其儀不忒容服有光以宴以娛德音不忘
亞終獻和安 望高六宮位應四星輔佐君子警戒相
成禕衣褒宗琛冊追榮于以奠之有椒其馨

徹豆成安 濯濯其英殖殖其庭有來羣工賚我思成

嘉肴既將旨酒既清雍徹不遲福祿來寧

送神歆安 禮儀既備神保聿歸洋洋在上不可度思
神之來兮盼饗之隨神之去兮休嘉是貽

上欽成皇后冊寶六首

入門升殿顯安 上帝錫羨寔生婉淑輔佐神皇寵膺
天祿誕育泰陵劬勞顧復於昭徽音久而彌郁

迎神歆安 於顯惟德徽柔懿明嬪于初載有聞惟馨
肆我鼓鍾萬舞在庭神保是格來止來寧

盥洗嘉安 有煒柔儀率履不越惠于初終既明且達
我將我享相盥乃登胡臭亶時攸介攸寧

升降熙安 苾苾其芳馥核維旅陟降孔明有秩斯所
雍容內化維神之明明則不渝綏我思成

酌獻明安 天維顯思有相于內右賢去邪夙夜儆戒
猗歟追冊重翟禕衣既右享之百世是儀

亞終獻和安 酌彼玉瓚有椒其馨醴假無言雍容在
庭生莫與宗於赫厥聲祀事孔明神格是聽

上明達皇后冊寶五首

迎神歌安 恭儉宜家柔順承天德
昭彤管憂在進賢
寶冊禕翟追榮壽原四時裸享何千萬年

酌獻明安 涓宮有嚴廣樂在庭
鐘鼓筦磬九變既成
縮茅以獻潔秬惟馨靈遊可想來燕來寧

退文舞進武舞昭安 秉翟竣事萬舞
擬金總干揮戚
節以鼓音禮容有煒盼蠻來歆
淑靈是聽雅奏愔愔
徹豆成安 登獻罔愆俎豆斯徹
神具醉止禮終樂闋

御事既退珊珊佩玦介我繁祉歆此蠲潔

送神歆安 備成熙事虛徐翠楹神保聿歸雲車夙征

鑒我休德神交惚恍留祉降祥千秋是享

紹興別廟樂歌五首

升殿崇安 新廟肅肅歲事以時陟降階城雍容有儀

鞠躬周旋罔敢不祇祝史正辭靈其格思

奉俎肅安 肇嚴廟祀爰圖遺芳物必稱德或陳或將

有緝其儀有苾其香靈兮來下割烹是嘗

懿德皇后室酌獻明安 曾沙表慶正位椒庭徽音杳

邈宮壺儀刑虔修祀事清酌惟馨縮以包茅昭格明

靈

亞終獻嘉安 霄漢月墮郊原露晞徽音如在延佇來

歸有酒既清累觴載祗神具醉止燕衍怡怡

徹豆寧安 僊馭弗返眇邈清都薦此嘉穀既豐既腴

莫享有成鼓樂愉愉徹我豆籩率禮無踰

乾道別廟樂歌三首

詣廟乾安 涓選休辰于秋之杪既濟既戒爰假祖廟
有佺儀坤舊章是儆身祀奚為天子純孝

升殿乾安 宗祀九筵先薦闕宮陟自東階煌煌袞龍
於穆聖善監茲禮容是享是宜介福無窮

懿節皇后室酌獻歆安 丕顯文母厚德維坤僊馭雖
邈徽音固存瑟彼玉瓚酌此鬱尊簡簡穰穰裕我後
昆

紹興別廟二首

安穆皇后室酌獻歆安 祥發倪天符彰夢日有懷慈

容孝享廟室泰尊是酌 旨酒嘉粟靈其格思祚以元

吉

安恭皇后室酌獻歆安 美詠河洲德嬪媯泃徽音如

存肇修已事縮以包茅酌以醴齊靈來顧歆降福攸

備

紹興二十九年顯仁皇后祔廟一首

酌獻歆安 恭惟聖母躋祔孔時陳羞宗祏徼福坤儀

鐘鼓惟序牲玉載祗於皇來格永介丕基

開禧三年成肅皇后祔廟一首

酌獻歆安 天合重華內治昭融承承繼繼保佑恩隆
歸從阜陵登祔太宮燕我後人福祿來崇



宋史卷一百三十四

宋史卷一百三十四考證

樂志九告受天書瑞安○瑞安通考作瑞文

六室加謚顯安○顯安通考作正安

宋史卷一百三十四考證

欽定四庫全書

史部
宋史卷一百三十五
八至

詳校官編修臣邱庭滢

洗馬臣王坦修覆勘

覆校官編修臣沈清藻

校對官監丞臣侍朝

謄錄貢生臣李玉瓚

欽定四庫全書

宋史卷一百三十五

元中書右丞相總裁托克托等修

樂志第八十八

樂十

樂章五

朝謁玉清昭應宮
太清宮
朝享景靈宮
封禪
祀汾陰
奉天書
祭九鼎

真宗奉聖祖玉清昭應宮御製十一首

降聖真安
魏魏真字奕奕殊庭規模太紫炳煥丹青

元命祇荅大猷是經多儀有踐丕應無形肆設金石
聲聞杳冥佇迴飈馭永祐基扃

奉香靈安 芳氣上泱飈馭下臨紹承丕緒永勵精明
氤氲成霧葱鬱垂陰虔恭對越介祉攸欽

奉饌吉安 發祥有自介福無疆紛綸丕應保佑下方
嘉薦斯備雅奏具揚寅威洞達監眇昭章

玉皇位酌獻慶安 無體之體強名之名監觀萬寓統
治九清真期保祐瑞命昭明乾乾翼翼祇荅財成

聖祖位酌獻慶安 於昭靈貺誕啓鴻源功濟庶彙慶

流後昆蘭肴登俎桂酒盈尊俯迴飈駕永庇雲孫

太祖位酌獻慶安 赫赫藝祖受命高穹威加海外化

浹區中發祥宗祐錫祐眇冲欽承積德勵翼精衷

太宗位酌獻慶安 明明文考儲精上蒼禮樂明備溥

率賓王功德累洽歷數會昌孝思罔極丕祐無疆

亞終獻冲安 太初非有體至道本無聲降迹臨下土

成功涉上清至仁敦動植丕緒啓宗祊紫禁承來格

鴻基保永寧發祥垂誕告致孝薦崇名廣樂神欽奉
儲休固太平

飲福慶安 明明始祖誕啓慶基翼翼後嗣虔奉孝思
精潔斯達祉福咸宜于以報貺于以受釐

徹饌吉安 雕俎在御飈駕聞聲真遊斯降旨酒斯盈
大樂云闋大禮云成徹彼常薦罄此明誠

送聖真安 精心既達真遊允臻禮容斯舉福應惟醇
將整仙馭言還上旻永存嘉貺用泰烝民

迎奉聖像四首

並用
慶安

玉皇位

玉虛上帝金像睟容宅真雲構練日龜從惟

皇對越率禮寅恭靈心不應福祿來宗

聖祖位

總化在天保昌厥緒降格皇闈瓊輪載御藻

仗星陳睟容金鑄佑我慶基宅茲靈宇

太祖位

烝哉大君聿懷帝祖鎔範真儀奉尊靈宇至

感祥開洪輝物覩瞻謁盡恭飛英率土

太宗位

於顯神宗德洽區中祥金爍冶範茲睟容殊

庭胥宇備物致恭明威有赫降福來同

玉清昭應宮上尊號三首

奉告隆安 登隆妙號欽翼淵宗茂宣德禮有恪其容
奉章升薦垂佩彌恭揚休詠美以間笙鏞

太初殿奉冊寶登安 皇靈垂祐洪福彌隆祇率絲宮
潔祀真容嚴恭奉冊對越清躬睟容肅穆懿號尊崇
禮盛樂舉福祿來同

二聖殿奉絳紗袍登安 赫赫列聖威德巍然彤彤靈

宇睟儀在焉奉以龍袞被之象天重慶宗稷億萬斯
年

太尉奉聖號冊寶真安 上旻降監介祉寶繁邦家脩
報妙道歸尊增名霄極奉冊靈軒茂宣聖典永祐黎
元

寶冊升殿大安 圖書昭錫典禮紹成烝民何幸教父
儲靈欽承景貺祇奉崇名致虔寶冊垂祐基扃

降神真安 猶龍之聖降生厲鄉教流清淨道符混茫

大君肅謁盛儀允臧森羅羽衛躬薦蕭鄉簪紱濟濟
鍾石洋洋高真至止介福誕祥

奉玉幣靈安 琳宮奕奕黼坐煌煌玉帛成禮飈馭延
祥鴻儀有則景福無疆嘉應昭協丕猶誕揚

奉饌吉安 金奏以諧飈遊斯格靈監章明皇心勵翼
肅奉雕俎來升綵席享德有孚凝禧無斁

酌獻大安 欽宗至道肅謁殊庭順風而拜明德惟馨
飈馭來格尊酒斯盈是酌是獻心通杳冥

飲福大安 彼渦之壤指李之區千乘萬騎來朝密都
躬陳芳薦款接仙輿飲酒受福永耀鴻圖

亞終獻正安 邈矣道祖冥幾惚恍常德不離至真無
象引位清穹降祥神壤酌醴薦誠控飈來享

送神真安 醴醖在戶金奏在庭籩豆有踐黍稷非馨
義盡蠲潔誠通杳冥言旋風駟祚我脩齡

太極觀奉冊寶一首

登安之曲 薦號穹冥登名祖禰陟配陽郊協宣典禮

感電靈區誕聖鴻懿冊寶斯陳福祿來暨

景靈宮奉冊寶一首

登安之曲 穆穆真宗錫美蕃昌飈輪臨貺諄誨洞彰

虔崇懿號祇荅景祥至誠致享降福無疆

景祐元年親享景靈宮二首

降真太安 真館奉幣潔齊致馨靈因斯格社稷慶寧

送真太安 椒漿尊享玆饌精祈睟容杳邈瑤輅霞飛

大觀三年朝獻景靈宮二首

奉饌吉安 威靈洋洋靡有常嚮於惟欽承來假來饗

博碩芬香是烝是享奉器有虔載德無爽

爾牲既克是烹是肆爾肴既具是羞是饋非物之重
惟德之備神之格思歆我精意

高宗郊前朝獻景靈宮二十一首

皇帝入門乾安 維皇齊居承神其初顛顛昂昂龍步

雲趨景鍾鏗如肅覲清都彤鬘之交神人用孚

升殿乾安 帝既臨享罄茲精意對越在天爰升紫陛

孔容翼翼保承丕緒孝奉天儀永錫爾類

降聖太安 惟德馨香升聞八方粵神臨之來從帝鄉

萬靈景衛有熒其光監我精純降福穰穰

盥洗乾安 齋居皇皇瓊琚鏘鏘承祭之初其如在旁
挹彼注茲儲禧迎祥神之聽之欣欣樂康

聖祖位乾安 涓選休辰有事嘉薦琅琅瓊珮陟降巖
殿其陟伊何幣玉斯奠周旋中禮千億儲羨

聖祖位奉玉幣靈安 上靈始祖雲景元尊嚴祀夙展

六樂朱軒明玉之潔豐帛之溫暢乃繼序承德不愆
還位乾安 我后臨饗奠幣攸畢式旋其趨架度有式
禮容齋莊孝思純實天休滋至時萬時億

奉饌吉安 百職駿奔來相于庭奉盛以告登茲芳馨
際天蟠地默運三靈神兮來歆祚我休平

再盥洗乾安 有嚴大禮對時休明情文則粲蠲潔必
清再臨觀盥以專以精真游來格永觀厥成

再詣聖祖位乾安 於赫矣宋十葉華耀屬茲郊報陟

降在廟其降伊何椒漿桂酒再拜斟酌永御九有

聖祖位酌獻祖安

御製

瑶源誕啓玉牒肇榮覆育羣有

監觀圓清酒醴既洽登薦惟誠無有後艱駿惠雲仍
還位乾安 奠鬯告成式旋厥位天步雍容神人燕喜
九廟觀德百靈薦祉子孫其昌垂千萬祀

文舞退武舞進正安 於皇樂舞進旅退旅一弛一張

笙磬具舉豈惟玩聲象德是似神鑒孔昭福祿來予
亞終獻冲安 五音飭奏神既億康澹其容與薦此嘉

觴有來顯相銷玉鏘鏘奉承若宥罔不齊莊

飲福報安 嘉薦既終神眎斯復賚我思成靈光下燭

孝孫承之載祗載肅敷錫庶民亟蒙祉福

還位乾安 帝臨闕庭逆釐上靈神鷄安坐肅若有承

嘉觴既申德聞惟馨靈光留俞祚我億齡

徹饌吉安 普淖既薦苾芬孔時神嗜而顧有來燕娛

饗矣將徹載欽載祗展詩以侑益臻厥熙

送真太安 雍歌既徹熙事備成神夕奄虞忽乘青冥

靈心回睇監我精裡誕降嘉祉休德昭清

降殿乾安 我秩元祀上推靈源展事有佺祲威肅然
丹城既降秉心益虔荷天之休于千萬年

望燎乾安 奕奕靈宮有嚴密祀燔燎具揚禮儀既備
帝心肅祇天步旋止對越在天永膺蕃祉

還大次乾安 帝將于郊昭事上祀爰茲畢觴復即于
此飈游載旋容旌沓騎維皇嘉承錫祚昌熾

高宗明堂前朝獻景靈宮十首

降聖大安 德惟馨香升聞八方粵神之從燦然有光
驂飛乘蒼啾啾蹌蹌逍遙從容顧予不忘

升殿乾安 帝既臨享龍馭華耀孝孫承之陟降在廟
誠意上交慶陰下冒天休駢至千億克紹

聖祖位奠玉幣靈安 玉氣如虹豐繒充笥既奉既將
亦奠在位有永羣后實相祀事何以臨下心意不貳
奉饌吉安 瓊琚鏘鏘玄衣繡裳薦嘉升香粢盛芬芳
禮儀莫愆鼓鐘煌煌曾孫之常綏福無疆

聖祖位酌獻祖安 裴回若留靈其有喜薦我馨香挹

茲酒醴我祖在天執道之紀申佑無疆奏神稱禮

文舞退武舞進正安 進旅退旅載執于戚不愆于儀

容服有赫式妥式侑神保是格靈鑒孔昭孝思維則

亞終獻冲安

用舊
辭

飲福報安 於赫大神總司元化監我純精威光來下

延昌之貺千億馮藉曾孫保之不平是迓

徹饌吉安 洋洋降臨肅肅布列熙事既成嘉籙告徹

九天儲慶垂佑無缺寢明寢昌綿綿瓜瓞

送真太安 高飛安翔持御陰陽幽贊圓穹監觀四方

元精回復奄虞孔良畢觴降嘏偃蹇于驤

望燎乾安 奕奕原祠有嚴絜祀禮儀孔宣燔燎斯暨

帝心肅祗天步旋止熙事既成永膺蕃祉

孝宗明堂前朝獻景靈宮八首

盥洗乾安 合宮之饗報本奉先欽惟道阻澹發澹源

駕言謁歎其盥惟虔尚監精衷錫祚綿綿

聖祖乾安 駿命有開慶基無窮祇率百辟仰瞻睟容
鼓鐘斯和黍稷斯豐靈其居歆福祿來宗

還位乾安 嘉玉既設量幣既陳髣髴靈游來顧來寧
對越伊何厥惟一純佑我熙事以迄于成

奉饌吉安 發祥仙源流澤萬世曷其報之親饗三歲
相維列卿潔粢是饋匪物之尚誠之為至

再詣盥洗乾安 華燈熒煌瑞烟氤氳威神如在黼潔
必親再盥于壘再悅于中皇心肅祇其敢憚勤

再詣聖祖位乾安 歲逢有年月旅無射我將我饗如
幾如式肅爾臣工諧爾金石奉原休功垂裕罔極
還位乾安 旨酒思柔神具醉止工祝既告孝孫旋位
何以酢之純嘏來備燕及雲來蕃衍無已

文舞退武舞進正安 象德之成有奕其舞一弛一張
進旅退旅嘒以管蕭和以鏞鼓神其樂康永錫多祜
寧宗郊前朝獻景靈宮二十四首

皇帝入門乾安 闕幄邃深雲景杳冥天清日晡展容

玉庭締基發祥希夷降靈神其來燕是饗是聽

升殿乾安 帝居瑤圖璇題玉京日月經振列宿上熒

桂簋鈇芬瑚器華精彙承禋祀用戒昭明

降神太安六變圜鐘為宮 四靈晨耀五緯夕明風雲

晏和天地粹清靈兮來迎啓我子孫饗于純精

黃鐘為角 芬枝揚烈煥珠叶陶闔珍闡符展詩舞箭

神哉來下神哉來翔肅若有承靈心招搖

太簇為徵 龍車既奏鳳馭載翔帝幄佇靈天衢騰芳

神來留俞神來蹇驥禮鬯樂明奏假孔將

姑洗為羽

虹旌蜺旄鸞旗翠蓋星樞扶輪月御叶衛

靈至陰陰靈般齋齋來格來饗福流萬世

盥洗乾安

禮文有俶祀事孔明將以潔告允惟齊精

自盥而往聿觀厥成靈監下臨天德其精

詣聖祖位乾安

維宋肖德欽天顧右於皇道祖丕釐

靈祐萬萬殖繁瓜瓞孕茂克昌厥後世世孝奏

聖祖位奉玉幣靈安

高宗御
製見前

皇帝還位乾安 桂宮耽耽藻儀穆穆天回袞彩風韶

璜玉咸英皦亮容典炳煜假我上靈景命有僕

奉饌吉安 我簋斯盈我簠斯實或剝或烹或燔或炙

有殽既將為俎孔碩禮儀卒度永錫爾極

再盥洗乾安 觴澹初勺禮戒重盥假廟以萃取象于

觀清明外暢精肅中貫我儀圖之三靈攸贊

再詣聖祖位乾安 肇基駿命肇右鴻業鼎玉龜符垂

固萬葉靈貺具臻神光熒熒暉祚無彊規重矩疊

聖祖位酌獻祖安

高宗御製見前

還位乾安

皇帝瑞慶長發其祥纂系悠遠溯源靈長

德之克明休烈有光配天作極孝饗是將

文舞退武舞進正安

持翟成象秉朱就列旄乘整溢

鳳儀諧節揮舒皇文歌蹈先烈合好效懽福流有截

亞獻冲安

光煥紫幄神流玉房秉文侑儀嘉虞貳觴

震澹醉喜彷彿廸嘗璇源之休地久天長

終獻冲安

靈輿蹇驥畢觴泰筵貳饗允穆裸將克竣

垂恩儲祉錫羨永年將以慶成燕及皇天

詣飲福位乾安 若木露英清雲流霞蔓蔓芝秀馮馮

桂華綿瑞無疆產嘏孔奢皇則受之鞏我帝家

飲福酒報安 旨酒惟蘭勺漿惟椒福流瓚葦光燭琨

瑤拜貺清宮凝輝慶霄神其如在徘徊招搖

還位乾安 烝哉我皇繼天毓聖逆釐元都對越靈慶

如天斯久如日斯盛瑤圖濬邈永隆駿命

徹饌吉安 房銅陳列室簋登奉告饗具歆展徹惟拱

祥光奕奕嘉氣蒙蒙受嘏不訾燕天之寵

送真太安 雲車風馬靈其來游天門軼蕩神其莫留

遺慶陰陰祉發祥流康我有宋與天匹休

降殿乾安 璇庭爛景紫殿流光禮洽乾回福應日昌

聖系龐鴻景命溥將德茂功成率祀無疆

詣望燎位乾安 厥初生民淵濬唯祖芳薦既輟明燎

具舉德馨升聞靈貺蕃詡懷濡上靈佑周之祜

還大次乾安 帝假于宮曩承清祀天暉臨幄宸衛森

峙行繇大室旋趨紫時率禮不違式專靈祉

理宗明堂前朝獻景靈宮二首

餘用舊辭

升殿登歌乾安 我享我將罄茲精意陟降左右維天

與契齋明乃心祇肅在位於萬斯年百福來備

亞獻宮架冲安 慶雲郁郁鳴璆琅琅澹其容與申薦

貳觴奉承若宥神其樂康錫以多祉源深流長

大中祥符封禪十首

餘同南
北郊

山上園臺降神高安 巖巖泰山配德于天奉符展采

翼翼乾乾滌濯靜嘉罔有弗蠲上帝顧諟冷風肅然
昊天上帝坐酌獻奉安 皇天上帝陰隲下民道崇廣
覆化洽鴻鈞靈文誕錫寶命惟新增高欽事式奉嚴
禋

太祖配坐酌獻封安 於穆聖祖肇開鴻業我武惟揚
皇威有暉四隩混同百靈震疊陟配高穹明靈是接
太宗配坐酌獻封安 祇若封祀神宗配天禮樂明備
莫獻精虔景靈來格休祥藹然於昭垂慶億萬斯年

亞獻恭安 因高定位禮脩物備薦鬯卜牲虔恭寅畏
八音克諧天神咸暨降福穰穰永錫爾類

終獻順安 浩浩元精無臭無聲臨下有赫得一以清
備物致享薦茲至誠泰尊奠獻夙夜齊明

社首壇降神靖安 至哉坤元資生伊始博厚稱德沈
潛柔止降禪方位聿修明祀寅恭吉蠲永錫蕃祉

皇地祇坐酌獻禪安 坤德直方博厚無疆秉陰得一
靜而有常寶藏以發乃育百昌肅祇禪祭錫祉穰穰

大祖配坐酌獻禪安 皇矣聖祖丕赫神武秉運宅中
威加九土德厚功崇頌聲載路陟配方祇對天之祐
太宗配坐酌獻禪安 絜祀柔祇報功厚載思文太宗
侑神嚴配鍾石斯和籩豆咸在永錫坤珍資生為大
汾陰十首

降神靖安 茫茫坤載粵惟太寧資生光大品物流形
瞻言汾曲允宅神靈聖皇躬享明德惟馨

奠玉幣登歌嘉安 至誠旁達柔祇格思奉以琮幣致

誠在茲

奉俎豐安 博碩者牲載純其色體薦登俎聿崇坤德
后土地祇坐酌獻博安 秉陰成德敏樹宣功應變審
諦神力無窮沈潛剛克流謙示中潔茲奠獻妙物玄
通

太祖配坐酌獻博安 坤元茂育植物成形於穆聖祖
功齊三靈嚴恭配侑厚德攸寧永懷錫羨歆此惟馨
太宗配坐酌獻博安 報功厚載祀事惟明思文烈考

道濟羣生侑神定位協德安平馨潔並薦享于克誠
飲福博安 寅威寶命明祀惟虔協神備物罔不吉蠲
后祇格思靈颺肅然誕受景福遐哉億年

亞終獻正安 至哉柔祇滋生蕃錫滌濯靜嘉寅恭夕
惕金奏純如萬舞有奕立我烝民莫匪爾極

后土廟降神靖安 博厚流形秉陰成德柔順利正直
方維則明祇格思素汾之側祇載吉蠲宸心翼翼

酌獻博安 至哉物祖設象龍雕動靜之德翕闡攸宜

嘉粟以薦精禱洪釐茂宣陰貺五穀蕃滋

祇奉天書六首

朝元殿酌獻瑞文 妙道非常神變無方惟天輔德靈

貺誕章玄文昭錫寶歷彌昌禮宗明祀式薦馨香

含香園瑞文 運格熙盛將封介丘禮神之域瑞命殊

尤靈文薦降丕顯皇猷聖心肅奉永洽鴻休

泰山社首壇升降瑞文 玄穹眷懷寶符申錫垂露騰

文粲然靈迹發祥吉圖純熙烏奕登薦欽崇式昭天

歷

奉香酌獻瑞安 謂天蓋高惟皇合德倬彼靈章圖書

是錫眷命諄諄被以遐歷膺錄告成虔恭欽翼

地屆興王祥開圖錄典禮昭成祺祥交屬大輅逶迤

卿雲紛郁祐我含靈錫茲介福

祥符七年奉祀畢天書迴至應天府有雲

物之瑞命製是曲以紀休應

升降靈文 旻穹無聲惟德是輔降監錫符垂文篆素

孝瑞紀封英聲載路既壽而昌篤天之祐

祭九鼎十二首

帝土王鷲

日祀

降神景安

日號丙丁方號中央德惟其時

蠲吉是將夫何飲之黃流玉瓚夫何食之有陳伊饌

奉饌豐安

粢盛既豐牲牢既充展茲熙事温温其恭

惟明欣欣燔炙芬芬保乎天子繁祉薦臻

亞終獻文安 工祝致辭黃流協鬯爰登清歌載期神

享噫予誠心精禋是虔嘉予陳祀豐盈豆籩

春分蒼鼎亞終獻成安 法乾剛兮鑄鼎奠方涓嘉旦

兮齊明迎祥胡為持幣維箱及筥胡為和羹有錡維
釜

立夏罔鼎迎神凝安 我方東南我日朱明爰因其時
鼎以罔名絜盛既馨牲牲既盈佑我皇家巽令風行
亞終獻成安 黃流在中惟馨香祀於薦于神爰祇厥
事禮從多儀以進為文尊葷三獻昭示孔勤

夏至彤鼎酌獻成安 犧尊將將俎基自堂牲牲肥腩
鼓鐘嗶嗶肆予醴齊椒馨飴香聿來歆顧天祚永昌

立秋阜鼎酌獻成安

明德宗享磬筦鏘鏘鏗兮佩舉

莪冠齊莊肆陳有序承筐是將其牲伊何籩豆大房

秋分晶鼎亞終獻成安

神宮巍巍庭燎有輝聲諧備

樂物陳豐儀清酏既載酌言獻之惟神醉止聿來蕃

釐

立冬魁鼎迎神凝安

時運而冬乃神玄冥陰陽相推

豐年以成越陳嘉肅牲牢粢盛來享來依監于明誠

酌獻成安

壘之初登其儀昭陳壘之既裸其香升聞

神心嘉止於焉欣欣貽我有年穰穰其仁

冬至寶鼎奠幣明安 秉心齊明奉牲博碩匏絲鏗陳
冠佩儼飾其肆其將明神來格執奠維何猗歟幣帛

宋史卷一百三十五

宋史卷一百三十五考證

樂志十標目太清宮○

臣酉

按後有太極觀並無太清

宮也此處恐誤

真宗奉聖祖玉清昭應宮御製十一首○昭應宮下通
考有景靈宮三字

宋史卷一百三十五考證

欽定四庫全書

宋史卷一百三十六

元中書右丞相總裁托克托等修

樂志第八十九

樂十一 樂章六

祀嶽鎮海瀆

祀大辰

太中祥符五嶽加帝號祭告八首

迎神靜安 鐘石既作俎豆在前雲旗飛揚神光肅然

當駕颺歛來乎青圓言備緝禮享茲吉蠲

冊入門正安 節彼喬嶽神明之府秩秩威儀肅肅靈

宇懿號克崇庶物咸覩帝籍升名式綏九土

酌獻東嶽嘉安 節彼岱宗有嚴廟貌惟辟奉天依神

設教帝典焜煌嘉薦普淖至靈格思殊祥是效

南嶽 作鎮炎夏畜茲靈光敷與萬物既阜既昌爰列

溫玉式薦徽章昭嘏神意福熙穰穰

西嶽 瞻言太華奠方作鎮典冊是膺等威以峻上公

奉儀祀宮薦信介祉萬邦永配坤順

北嶽 仰止靈嶽鎮于朔方增崇懿號度越彝章祇薦
嘉樂式陳令芳永資純佑國祚蕃昌

中嶽 巖巖神嶽作鎮中央肅奉徽冊尊名孔章聿降
飈駕載獻蘭觴熙事允洽寶祚彌昌

送神靜安 祇薦鴻名寅威明祀有楚之儀如在之祭
奠獻既終禮容克備神鑒孔昭福禧來暨

天安殿冊封五嶽帝一首

冊出入正安 名嶽奠芳帝儀克舉吉日惟良九賓咸
旅溫玉鏤文纁裳正宇禮備樂成篤神之祐

熙寧望祭嶽鎮海瀆十七首

東望迎神凝安 盛德惟木勾芒御神沂岱淮海厥功
在民爰熙壇坎袞對庶神于以歆格靈貽具臻

升降同安 紳鞞檐兮玉佩樂兮于我將事神燕喜兮
帝命望祀敢有不共往返于位肅肅雍雍

奠玉幣明安 祀以崇德幣則有儀肅我將事登降孔

時精明純潔罔有弗祇史辭無愧神明來娒

酌獻成安 肇茲東土含潤無疆維時發春嘉薦令芳
祭用糝沈順性含藏不涸不童誕降祺祥

送神凝安 神之至止熙壇為春神之將歸旂服振振
歛兮迴飈窅兮旋雲祐于東方永施厥仁

南望迎神凝安 嵩嵒衡霍暨厥海江時維長養惠我
南邦肆嚴牲幣神式來降以侑以妥百福是龐

酌獻成安 景風應律朱鳥開辰肅肅明祀嘉籩列陳

牲用牲物樂奏蕤賓克綏永福祐此下民

送神凝安

鼓鐘云云歛管伊伊神既醉飽曰送言歸

山有厚藏水有靈德物其永依往奠炎宅

中望迎神凝安

維土作德維帝御行含養載育萬物

以成有嚴祀典薦我德馨神其歆止永用億寧

酌獻成安

高廣融結實維中央宣氣報功利彼一方

坎壇以祀六樂鏘鏘靈其有喜酌以大璋

送神凝安

言旋其處以奠中域無替厥靈四方是則

神永不息祀永不愆以享以報于萬斯年

西望迎神凝安 品物順說時司金行于郊迎氣以望

庶靈雅歌維樂主薦維牲作民之祉永相厥成

酌獻成安 西顛沆碣執矩司秋諏言協靈時祀孔脩

禮有薦獻爰祀公侯秩而祭之百福是道

送神凝安 我樂我神簋俎腥饗曰神之還西土是宮

于蕃禽魚于衍草木富我藪隰滋我高陸

北望迎神凝安 帝德乘坎時御閉藏爰潔牲醴兆茲

北方海山攸宅神施無疆具享蠲吉降福孔穰

酌獻成安 淒寒凝陰隕穉滌場百物順成黍稷馨香

款于北郊爰因其方向以侑神薦此嘉觴

送神凝安 維山及川奠宅幽方我度其靈降止靡常

肅肅坎壇既迎既將促樂徹俎是送是望

紹興祀嶽鎮海瀆四十三首

東方迎神凝安 帝奠九壎孰匪我疆繫我東土山川

相望祀事孔時肅雍不忘業我濛鴻郁哉洋洋

初獻盥洗同安 青陽肇開祀事孔飭鬱人贊溉其馨
苾苾敬爾威儀亦孔之則神之格思無我有斲

奠玉幣明安 司厯告時維孟之春爰舉時祀旅于有
神鼓鐘既設珪帛具陳阜蕃庶物以福我民

東嶽位酌獻成安 巖巖天齊自古在昔膚寸之雲四
方其澤惟時東作祀事廼飭惠我無疆恩霑動植

東鎮位 惟山有鎮雄於其方東孰為雄于沂之疆祀
事有時爰舉舊章我望匪遙庶幾燕饗

東海位 瀕洞鴻濛天與無極導納江漢節宣南北順
助其功善下惟德我祀孔時以介景福

東瀆位 我祀伊何于彼長淮導源桐柏委注蓬萊扞
齊護楚宣威示懷豆籩列陳亦孔之偕

亞終獻酌獻

四位並同

我祀孔肅神其安留容與裴回若

止若浮洽此重觴申以百羞無我數遺萬邦之休

送神凝安 蹇兮紛紛神實戾止以飲以食以享以祀

呦兮冥冥神亦歸止以醉以飽以錫爾祉

南方迎神凝安 朱明盛長我祀用飭厥祀伊何山川
咸秩如將見之繩繩齊栗神哉沛兮消搖來格

初獻盥洗升降同安 爰熙嘉壇揭虔誌祀鬱人沃盥

贊我裸事于降于登以作以止莫不肅雍告靈饗矣
奠玉幣明安 我祀我享儀物孔周一純斯舉二精聿
脩璞兮其溫絲兮其紕是薦吉蠲神兮安留

南嶽位酌獻成安 神曰司天居南之衡位焉則帝于
以奠方南訛秩事望禮有常庶幾嘉虞介福無疆

南鎮位 維南有山于彼會稽作鎮在昔神則司之厥
有舊典以祀以時百味維旨靈其燕娛

南海位 維水善下利物曰功逶迤百川誰歟朝宗蕩
蕩大受於焉會同管簫列陳以答鴻濛

南瀆位 四瀆之利經營中國南曰大江險兮天設維
爾有神隄其廟食望秩孔時我心翼翼

亞終獻酌獻 神之游兮洋洋對越澹乎容與盼饗斯
答乃奏既備八音攸節重觴申陳百禮以洽

送神

曲同
迎神

薦徹豆籩熙事備成靈兮將歸羽旄紛紜

飄其逝矣浮空籊雲悵然顧瞻有撫懷心

中央迎神凝安 天作高山屹然中峙經營厥宇萬億

咸遂火熙土王爰舉時祀繩繩宣延彷彿來止

初獻盥洗升降同安 思來感格肅雍不忘禮儀既備

濟濟蹌蹌潔蠲致敬往薦其芳交若有承神兮孔饗

奠玉幣明安 練日有望高靈來下何以告誠心惟物

假有籓斯實有寶斯籍于以奠之神光燭夜

中嶽位酌獻成安 與天齊極伊嵩之高顯靈効異神

休孔昭飭我祀事實俎鸞膾以侑旨酒其馨有椒

中鎮位 禹畫九州河內曰冀霍山崇崇作鎮積勢我

祀如何百末旨味承神燕娛諸神畢至

亞終獻酌獻 禮樂既成肅容有常奄留消搖申畢重

觴仰臚所求降福滂洋師象山則以況皇章

送神

曲同
迎神

虞至旦兮靈亦有喜蹇欲驤兮象輿已轍

粥音送兮靈聿歸矣長無極兮錫我以祉

西方迎神凝安 有宓斯安有涵斯洽聿相厥成允祀
是答爰飭迺奏迺奏既協於昭降止是遵是接

初獻盥洗升降同安 靡實不新靡陳不濯人之弗蠲

矧敢將酌載晞之悅載濡之勺洗儀告備陟降時若
奠玉幣明安 彼林有葭彼澤有沈猗與西望弗菲弗
淫迺追斯邸迺愰斯尋卽禮既卒是用是歆

西嶽位酌獻成安 屹削厥方風雲斯所陰邑有宮恤
恤侯侯清酏在尊靈眷在下于俎獻兮則莫我吐

西鎮位 維吳崇崇于汧之西瞻彼有隴赫赫不迷克
禋于嶽我酌俶齊於凡有旅眡公維躋

西海位 奄浸坤軸滋殖其濊而典斯稽有陞有墮弗
替時舉元筭斯酌胡先于河實委之會

西瀆位 自彼崑虛于以潛流念茲誕潤豈侯不猶在
昔中府暨海聿脩迄既望止神保先貞

亞終獻 肅肅其乂既旨既溢迨其畢酌偏茲博碩祀
事既遂不敢諄射神或醉止我心斯懌

送神

曲同
迎神

迺羞既徹迺奏及闕無餽斯俎式聽致謁
不蹇不蹶不沸不決厲魁其祛永庇有截

北方迎神凝安

我土綿綿孰匪疆理惟時幽都匪曰

隃只滌哉良月朔風其同曷阻曷深其亦來降

初獻盥洗升降同安

壽宮輝煌聿修時祀續其臨矣

吉蠲以竣居乎昂昂行乎遂遂敬爾攸司展采錯事

奠玉幣明安

相予陰威厥功浩浩一歲之功何以爲

報府有珪幣我其敢私肅肅孔懷予以將之

北嶽位酌獻成安 瞻彼芒芒曰北之常既高既厚迺

紀迺綱薦鬯伊始靈示孔將玄服鐵駕覽此下方

北鎮位 赫赫作鎮幽朔之垂兼福我民食哉具宜克

配彼岳有嚴等衰蠲我灌禮其敢不祗

北海位 八裔皆水此一會同沄沄天墟洞蕩洪濛至

哉維坎不有斯功所秩伊何黃流在中

北瀆位 水星之精播液發靈不脅于河既介以清翼

翼盥薦椒糝芳馨載止載留爰弭翠旌

亞終獻 俎豆紛披金石繁會侑以貳尊匪瀆匪怠我
儀既周我心孔戒愴兮容與彷彿如在

送神

曲同
迎神

靈既醉飽禮斯徹兮靈亦樂康樂斯闕兮
雲征颺舉不可尼兮薦福錫祉曷有極兮

淳祐祭海神十六首

迎神始安宮一曲 堪輿之間最鉅惟瀛包乾括坤吐

日滔星祀典載新禮樂孔明鑒吾嘉賴來燕來寧

角一曲 四溟廣矣八紘是紀我宅東南迴復萬里洪

濤飈風安危所倚祀事特隆神其戾止

徵一曲 若稽有唐克致崇極祝號既升爰增祭式從
享于郊神斯受職我祀肇新式祈陰隲

羽一曲 猗與祀禮四海會同靈之來沛鞭霆馭風盼
蠻彷彿在位肅雍佑我烝民式徵神功

升降欽安 靈之來至垂慶陰陰靈之已坐飭茲五音
壇殿聿嚴陟降孔欽靈宜安留鑒我德心

東海位奠玉幣德安 百川所歸天地之左瀕洞鴻濛

功高善下行都攸依百祿是荷制幣嘉玉以侑以妥

南海位奠玉幣瀛安 祝融之位貴乎三神吞納江漢

廣大無垠長為委輸祐我黎民敬陳明享允鑒恭勤

西海位奠玉幣潤安 蒲萑之澤派引天潢義娥出入

浩渺微茫蓋高斯覆猶隔封疆我思六合肇正吉昌

北海位奠玉幣瀚安 翰海重潤地紀亦歸吞受百瀆

限制北陸一視同仁我心則怡嘉薦玉幣神其格思

捧俎豐安 昭格靈貺祀典肇升牲牲告充雕俎是承

薦虔効物省德惟馨靈其有喜萬宇肅澄

東海位奠酌獻熙安 滄溟之德東南具依熬波出素

國計攸資石臼却敵濟我王師神其享錫益畀燕綏

南海位酌獻貴安 南溟浮天旁通百蠻風檣迅疾琛

舶來還民商永賴坐消寇姦薦茲嘉觴弭矣驚瀾

西海位酌獻類安 積流疏派被于流沙布潤施澤功

均邇遐我秩祀典四海一家祇薦令芳靈其享嘉

北海位酌獻溥安 儵忽會同裴回安留牲肥酒香晨

事聿脩惟德之涼曷奄九州帝命是祇多福自求

亞終獻饗安 邊豆有楚貳觴斯旅神其醉飽式燕以

序百靈祕怪蜿蜒飛舞錫我祺祥有永終古

送神成安 告靈饗矣錫我嘉祚乾端坤倪開豁呈露

玄雲聿收羣龍咸驚滅除凶災六幕清豫

紹興祀大火十二首

降神高安園鍾為宮 五緯相天各率其職司禮與視

則維熒惑至陽之精屆我長羸于以求之祀事孔明

黃鍾為角 有出有藏伏見靡常相我國家鑒觀四方
視罔不正終然允臧其神來格明德馨香

太簇為徵 小大率禮不愆于儀展采錯事秩祀孔時
維今之故閱我數度修厥典常神其來顧

姑洗為羽 於赫我宋以火德王永永不圖絜神之相
神之來矣維其時矣禮備樂奏神其知矣

升殿正安 有儼其容有潔其衷屹屹崇壇伊神與通
神肯降格嘉神之休虔恭降登神乎安留

熒惑位奠玉幣嘉安 馨香接神盼嚮恍惚求神以誠

薦誠以物有藉斯玉有筐斯幣是用薦陳昭茲精意

商邱宣明王位奠幣嘉安 熒惑在天惟火與合繫神

主火純一不雜作配熒惑祀功則然不腆之幣予以

告虔

捧俎豐安 火遵其令無物不長視此牲牢務得其養

黍以祀神有膄其肥非神之宜其將曷歸

熒惑位酌獻祐安 皇念有神介我戩穀登時休明有

此美祿酌言獻之有飶其香神兮燕娛醉此嘉觴

宣明王位酌獻祐安 誰其祀神知神嗜好闕伯祀火

為神所勞睠言配食既與火俱於樂旨酒承神嘉虞

亞終獻文安 神既貺施嗜我飲食申以累獻以承靈

億神方常羊咸畢我觴于再于三于誠之將

送神用理安 登降上下奠璧獻斝音送粥粥禮無違

者已虞至旦神其將歸顧我國家遺以繁釐

出火祀火辰十二首

降神高安園鍾為宮 熒熒我宋火德所畀用火紀時

允惟象類神自類歌誠繇類至有感斯通孚我陽燧
黃鍾為角 樂音上達粵惟出虛火性炎上亦生於無
我鏞我磬我笙我竽氣同聲應昭哉合符

太簇為徵 火在六氣獨處其兩感生維君繫辰克相
何以驗之占茲垂象騰駕蒼蚪歛其來饗

姑洗為羽 星入於戌與火俱誦火出於辰與星俱伸
一伸一誦孰操縱之利用出入民咸用之

升殿正安 屹彼嘉壇赤伏始屆
掞光耀明洋乎如在
俛仰重離默與精會
隨我降升肅聽環珮

大辰位奠玉幣嘉安 維莫之春
五陽發舒日之夕矣

三星在隅莫量匪幣
莫嘉匪玉明薦孔時
神光下矚

商邱宣明王奠幣嘉安 二七儲神
與天地竝孰儷厥

德聿惟南正功懋陶
唐澤流億姓作配嚴
禋贄列惟

稱

捧俎豐安 有嚴在滌
陳彼牲牢孔碩其俎
薦此血毛

厥初生民飲茹則然以燔以炙伊誰云先

大辰位酌獻祐安 孰為大辰維北有斗曾是彗星斯
名孔有幽崇報功潔齊敢後容與嘉觴式歆旨酒

宣明王位酌獻祐安 周設司燿雖列夏官仍襲孔易
闔端實難相彼商工永懷初造不腆桂椒匪以為報
亞終獻文安 潛之伏矣柞榘既休有椒其來榆柳是
求靈駕紛羽尚其安留飲我三爵言言油油

送神理安 五運惟火寔宗衆陽宿壯用明千載愈光

神保聿歸安處火房鬱攸不作炎圖永昌

納火祀大辰十二首

降神高安圜鍾為宮

赫赫皇圖炎炎火德侈神之賜

奄有方國染盛既豐俎豆有飶於萬斯年報祀無斁
黃鍾為角 火星之躔有燧其光表于辰位伏于戌方
時和歲稔仁顯用藏告爾萬民出納有常

太簇為徵

季秋之月律中無射農事備收火功告畢

克禋克祀有嚴有翼風馬雲車尚其來格

姑洗為羽 明明我后重祭欽祠有司肅事式薦晨儀
禮惟其稱物惟其時神之聽之福祿來為

升殿正安 猗與明壇右平左城冕服斯皇玉佩有節
陟降惟寅匪徐匪疾式崇大祀禮文咸秩

大辰位奠玉幣嘉安 金行序晚玉露晨清齊戒豐潔

肅恭神明嘉幣惟量嘉玉惟精于以奠之庶幾來聽
商邱宣明王位奠幣嘉安 恭惟火正自陶唐氏邑于

商邱配食辰祀有功在民有德在位敢替典常惟恭

奉幣

捧俎豐安 萬彙攸成四方寧謚工祝致告普存民力
迺薦斯牲為俎孔碩介以繁祉式和民則

大辰位酌獻祐安 庶功備矣休德昭明天地釀和鬱
鬯斯清玉瓚以酌瑤觴載盈周流常羊來燕來寧

宣明正位酌獻祐安 廣大建祀式崇其配馨香在茲
清酒既載穆穆有暉洋洋如在聿懷嘉慶絜神之賚

亞終獻文安 幣玉肅陳笙簧具舉桂醑浮觴瓊羞溢

俎禮有三獻式和且序神具醉止慶流寰宇

送神理安 神靈降鑒天地回旋惟馨薦矣既醉歆焉
諸宰斯徹式禮莫愆墮祉降祥天子萬年

宋史卷一百三十六

宋史卷一百三十六考證

樂志十一熙寧望祭嶽鎮海瀆十七首○

臣酉

按東南

中西北俱有迎神酌獻送神之樂獨升降奠玉幣之樂惟東望有之者蓋迎送酌獻諸樂五望各切其方惟升降奠玉幣二樂其詞可通用故也

宋史卷一百三十六考證